


諸葛孔明集傳兵法註釋部林

漢書門			
九	五	三	七
號	函	架	冊
七	一	七	一

內閣文庫			
九	五	三	七
號	冊	架	函
七	一	七	一

內閣文庫	
番號	漢 9537
冊數	7 (5)
函號	299 236

兵部





諸葛孔明異傳兵法註解評林卷之五

目錄

一 原兵

二 練兵

三 行軍

四 四機

五 軍威

六 應變據險

七 料敵

八 備器械


九 布陣

十 謀攻


十一 禦敵

十二 厲士

淺草文庫



一	二	三	四	五	六	七	八	九	十	十一	十二
原	兵



諸葛孔明異傳兵法註解評林卷之五

明

章嬰 與參編
王士騏鳳雛定

新書 十二篇

一 原兵

自古創業之君莫不以兵得天下以兵失天下夫何故先能而後不能蓋天下已定傳之數世承平日久子孫驕逸生於富貴之中不知創業之艱難不習軍旅忽於用兵之道或將非其人不幸主昏

臣恣禍起蕭牆或獨任成亂王綱失政四夷交侵
或中國悖叛或荒淫酒色恣縱情慾不恤國事或
君弱臣強政出多門權臣擅命是皆主上失御天
下之道也其所繇來者漸矣非一朝一夕之故也
斯所以失天下之繇也且創業之君多起於布衣
之間親臨卒伍披堅執銳汗馬驅馳兩軍相對日
不暇食而又廣求賢俊能用忠言知無不為小心
翼翼唯恐有失夙興夜寐勤勞至甚此所以能取
勝於人者也如前漢之高祖後漢光武之類是已

若夫安不忘危治不忘亂日新厥德務求其賢仁
人在位則無敵而失也且失國之大事莫過于用
兵然用兵有則可以取勝於人苟不得其法雖有
百萬之卒而能必勝者罕矣然則有國之君不可
以不知兵亦不可以全恃於兵亦不可以不恃於
兵夫兵者國之利器不可以輕用於人舉之有道
行之有則故能取勝於人也大則滅人之國小則
滅人之城或外禦四夷或討亂臣賊子或虜羣寇
之叛此國之必用而不疑者是故嚴肅兵甲以候

征討乃國之機也且國以兵為本兵以將為本卒以將為主必欲強兵戰勝而在用將得人用將得人然後可以威天下服四夷此有國之大本也且夫治則用文亂則用武此理之必然天下無事當治之以文天下有事當治之以武是故文武之道不可以一日而無也

料敵

夫為將之道才智過人料敵之意虛實為先多寡次之三軍之衆可使必戰而無敗者在於奇正奇

正之變使敵不能措手而大敗者此奇正之功也然能用奇正者將之智也可使必勝而能破其敵此大將之謀也猶田獵之用鷹犬也可使必獲而無失也大抵兵之所加如以石投卵者虛實是也以正合戰以奇取勝奇正之變不可勝窮也且兵之形象水水之形避高而趨下兵之勢避實而擊虛故兵無常勢水無常形能因敵變化而取勝者謂之神將若不嚴教道不明吏卒無常陣兵縱橫曰亂將之過也將不能料敵以少合衆以弱擊強

敗之道也將之至任不可不察也故為將之道料敵為先敵有間隙必急擊之而趨其危所謂見可而進知難而退是廼料敵之道也

三 練兵

軍之所興必須擇將君不擇將以其國與敵也將不知兵以其卒與敵也是故用兵之法教戒為先十人學戰教成十人十人學戰教成百人百人學戰教成千人千人學戰教成萬人萬人學戰教成三軍短者持矛戟長者持弓弩強者持旌旗勇者

持金鼓弱者給則養智者為謀主器械鋒銳甲冑堅密則人輕其戰進有重賞退有重刑行之以信勝之道也進不可當退不可追雖絕成陣雖敗成行與之以安與之以危其衆可合而不可離可用而不可疲斯廼練兵之道孔子曰以不教民戰是謂棄之若然則豈不教而用之者也

四 備器械

凡用兵之道器械為先若器械不利甲冑不堅雖有虎賁之士而豈能必勝哉若欲攻戰必先完其

器械擇其士卒馬步隨宜而用之或先或後可相繼而用之故甲冑不堅密與祖皆同也弩不及遠與無兵同也射不能中與無射同也中不能以入與無鏃同也是故破敵之道器械為先若器械鋒銳甲冑堅密士卒赳赳戰陣熟閒進退有則隊伍不失鼓之則進金之則止始可為戰也若夫甲冑不堅器械不利士卒失練猶張空拳而搏猛虎也吾知其敗必矣

行軍

夫三軍之衆百萬之師必須有則居必擇處戰則有成夫地形者兵之助也料敵制勝計險阻遠近勝之道也夫軍之行也好高而惡下貴陽而賤陰凡地之形所在各異而多不同有絕澗有天井有天窗有天羅有天陷有天隙軍行遇此之形必遠去之而勿近也吾遠之敵近之吾迎之敵背之是故軍行當遠六害兼知九地夫九地者有散地有輕地有爭地有交地有衢地有重地有圯地有圍地有死地道近而為陣則易散故曰散地入人之

境而不深者爲輕地我得亦利彼得亦利爲爭地
我可以往彼可以來爲交地兩境之地士屬先至
而得天下者爲衢地入人之境深歷城邑多者爲
重地山林險阻沮澤難行之道者爲圯地所繇入
者隘所從歸者迂彼寡可以擊兵之衆者爲圍地
疾戰則存不疾戰則亡爲死地是故散地則勿戰
輕地則勿止爭地則勿攻交地則勿絕衢地則合
交重地則掠圯地則行圍地則謀死地則戰是故
軍有所不擊城有所不攻地有所不爭君命有所

不受故將通於九地之利者則知兵矣將不達九
變之術雖知地利不能得地之助矣

〔六〕 布陣

夫古之良將應敵而制勝應變而無窮兩軍相拒
各用兵機深者勝淺者敗然布陣之道在乎臨時
先料敵之多寡我之強弱彼之虛實象地之宜而
宜之然爲陣之法理亦多端昔者大聖軒轅作八
十餘陣皆畫圖以傳於世罕有知之者其法大槩
或以奇爲正或以正爲奇奇正相生如環之無端

不可終窮也陣間容隊隊間容陣以前爲後以後爲前進無速奔退無遽走擊頭則尾應擊尾則頭應擊中則兩頭俱應變態無窮不離乎四奇八正以步軍爲正馬軍爲奇夫四奇者一曰前奇二曰右奇三曰左奇四曰後奇八正者一曰先鋒二曰左角三曰右角四曰左爪五曰右爪六曰左牙七曰右牙八曰後軍常以一奇當二正前奇當先鋒左角右奇當右角爪左奇當左爪牙後奇當右牙後軍四奇皆敗稟於大將八正皆敗稟於四奇故

正常以奇爲首所謂以寡制衆者此也居則各視其奇之所止出則各視其奇之所行行則奇常居前卒然遇敵觸處爲首兵觸前則前奇爲應觸左則左奇應觸右則右奇應觸後則後奇應行則前奇居前次先鋒次左角次右角次右爪次左爪次左奇次右奇次左牙次後奇次右牙次後軍止則四頭八尾遇敵則觸處爲首應敵則擊尾而首至此爲陣之要也古之良將能察敵之情內外之意不測之機當預防之彼以此來我以此應見機而

作應敵而變是知爲將之道也是故知吾卒之可
擊而不知敵之不可擊勝之半也知敵之可擊而
不知吾卒之不可擊不識地形之不可以戰勝之
半也知彼知己百戰百勝不知彼而知己一勝一
負不知彼不知己每戰必敗

七 四機

夫兵強將勇如猛虎之不可以犯似蛟龍之不可
以觸犯之必死觸之必亡天下莫不知也雖三尺
之童皆知避之唯恐不及也且古之良將來不可

敵去不可追坐不可守困不可圍良繇是也凡兵
有四機一曰陣機二曰器機三曰力機四曰將機
知此四者攻必克戰必勝三軍之衆百萬之師置
之存地則生陷之絕地則亡故戰須擇地得地之
助也是謂陣機器械鋒利甲兵堅密是謂器機赴
赴武夫如虎如彪一夫或進萬夫莫及馬善馳逐
是謂力機施設輕重臨敵決疑賞罰必信指揮三
軍料敵必勝是謂將機能知四機百勝之道也

八 謀攻

夫謀攻之法大則攻城小則野戰攻城為下不與
 戰而必全得之為上破軍次之屠城又次之是故
 百戰百勝非善之善者也不戰而屈人之兵善之
 善者也殺士卒三分之一而城不拔者此攻之災
 也善用兵者屈人之兵而非戰也拔人之城而非
 攻也毀人之國而非久也必以全爭於天下故兵
 不頓而利可全此謀攻之法也攻而必取者攻其
 所不勝也守而必攻者守其所不攻也進而不可
 禦者衝其虛也退而不可追者速而不可及也我

欲戰敵雖高壘深溝不得不與我戰者攻其所必
 救也我不欲戰雖畫地而守之敵不得與我戰者
 乖其所之也故形人而我無形則我專為一敵分
 為十是以十攻其一也則我衆敵寡能以衆敵寡
 則吾之所與戰者約矣

九軍威

夫軍之行也先張其勢多設旌旗廣造金鼓以千
 為萬以少為多以弱為強以勝伴為不勝剛必勝
 柔實必敗虛以大必吞其小此理之必然者也且

夫兵行詭道變化無窮因敵制勝有不測之機是
 為良將之道也夫金鼓所以威耳旌旗所以威目
 禁令刑罰所以威心耳威於聲不可不聽目威於
 色不可不明心威於形不可不嚴三者不立雖有
 百萬何益於用凡攻戰之法畫以旌旗為節夜以
 金鼓為則鼓之則進金之則止斯乃軍威之義也

十 禦敵

夫用兵之道何者為先蓋禦敵為先要識其機貴
 在神速不貴巧遲敵若有險而趨其危使敵望風

而奔惟恐走之不急凡可擊之道其義有十一曰
 敵人遠來新至行列未定可急擊之二曰敵軍方
 食未會設備可急擊之三曰敵人見利奔走可急
 擊之四曰敵人新至不知地利可急擊之五曰敵
 人涉長道後行未息人疾馬困可急擊之六曰敵
 人涉水半渡可急擊之七曰敵人行險道路狹窄
 可急擊之八曰敵人之陣內旌旗亂動可急擊之
 九曰敵人陣數動移可急擊之十曰將離士卒可
 急擊之又曰敵人心怖夜虛驚恐可急擊之又曰

師既淹久糧食無有士卒怨怒妖怪數起軍資既竭芻薪亦寡天多陰雨欲掠無所士卒不多水地不利人馬疾疫援兵不至道遠日暮士卒疲困倦而未食解甲而息士卒勞困三軍數驚陣而未定合而未畢行阪陟險諸如此者擊之無疑有不戰而避之者六曰土地廣大人民富庶二曰上愛其下恩惠流布三曰賞罰必信發必得時四曰陣功居列任賢使能五曰師徒之衆兵甲之精六曰隣國之助諸如此者避之勿疑故曰見可而進知

難而退也

十一 應變據險

夫應變者敵衆我寡當避之於易邀之於阨故曰以千擊百莫善於阨以千擊萬莫善於阻今有少卒猛起擊金鳴鼓於阨路雖有大軍莫不驚駭故曰用衆務易用少務險假使士卒數萬皆大險阻右山左水深溝高壘守以強弩退如山移進如雲用糧食又多難與久守此非騎卒之力智者之謀也能備千乘萬騎兼之從步分爲五軍各守一營


夫五軍五營敵人必惑莫知其所加敵若堅守以固其兵急行間牒以觀其慮彼聽吾說解之而去不聽吾說斬使焚書分爲五戰戰勝勿退不勝疾歸如是佯北隨行疾鬪一絕其前一絕其後兩軍啣枚或左或右而襲其處五軍交至必有其利此擊強之道也故曰三軍勝敗在於一人夫良將應敵之人而作神變不測之道也

十三 厲士

凡爲將之道務在必勝必勝之道又在於賞罰明

也賞罰既明而在於必信發號施令而人樂鬪兩軍相對而人樂戰兵旣相接而人樂死此三者將之所恃而能成功也若有士卒不盡力戰者罷戰之日請舉有功之人而進饗之無功者厲之軍中廣設坐分爲三行上功坐前行酒殺數味裊裊三層器皿皆金次功坐中行酒殺裊裊皆減三等器皿皆銀無功者坐後行酒殺又降一等坐裊不重器皿皆漆饗畢又頒賜有功者父母妻子金銀五帛之物以功爲差有戰死之家使使勞其父母注

不忘於心若此三者人人為之死戰無敵於天下
矣三軍之衆百萬之卒苟賞罰不明號令不信則
不能奮擊敵矣



諸葛孔明異傳兵法注解評林卷之五終

